



Nunat Avannarliit Killiit Siunnersuisoqatigiiffiata kaammattuutit aalajangersagaanik nr. 1/2023-mik Inatsisartut ilaliinissaanniuk siunnersuut

Nunat Avannarliit Killiit Siunnersuisoqatigiiffiata Islandimi, Kalaallit Nunaanni Savalimmiunilu naalakkersuisunut kaammattuutigaa

-Immamik nerisassaasivittut atukkatsinnik nunani avannarlerni killerni nunat suleqatigiillutik qanoq illersuisinnaanerannut ataatsimut isiginnilluni pilersaarummik ataatsimoorussamik aallartitsinissaq nunani avannarlerni killerni naalakkersuisut siulittaasuisa oqallisigissagaat

-pisuussutininik maangaannartitsinissaq pinngitsoortinniarlugu, inuussutissanik pilersuinerup isumannaatsuunissaa qulakkeeriarlugu, mingutsitsineq akiorniarlugu, Issittup sakkussakillisaaffiguarneqarnissaa aammalu uumasut assigiinngitsut amerlassusiannik imaanilu pissuseqatigiit ataqatigiinnerannik illersuiniarlutik nunani avannarlerni killerni naalakkersuisut siulittaasui anguniagaqarfiusumik suliaqassasut

-nunani avannarlerni killerni naalakkersuisut siulittaasui Atlantikup avannarpasissuata nunarsuarmi imartatut pijuartitsinissamik tunngaveqarnerpaatut inissisimalernissaanik nunap immikkoortuiniinnaanngitsoq aammali Issittumi nunanilu tamalaani suliniutiginnillutillu anguniagaqassasut aammalu tamatumani siuttuussasut

(Aallartitat siulittaasuat Doris Jakobsen Jensen)

(Siullermeerneqarnera aappassaaneerneqarneralu)

Qujanaq nunani avannarlerni killerni siunnersuisooqatigiinnut aallartitat siulittaasuannut siunnersuuteqarneranut.

Silaannaap allanngoriartorneri inunnit pilersinneqartut, mingutsitsineq aammalu immap mingutsikkaluttuinnarnera maani nunatsinni aammalu nunani avannarlerni killerni inuuniarnitsinnut annertuumik kingunerlutsitsisinnaavoq. Tamakku unamminartut ilumoorullugit tigusariaqarpagut, iliuseqartariaqarlutalu.

Politikkeritut meeqqagut ernuttagullu eqqarsaatigiuannartassavagut, isummerniarnitsinni. Kinguaariimmiuku tullii, nunarsuarmi inuunermik tunniussatsinnik ingerlatitseqqittussaasut. Tassani pingaartuuvoq, nunarsuarmik tunniussissasugut, neriunermik siunissarissaartumillu peqartumik.

Demokraatinut erseqqissassallugu pingaartuuvoq, maani nunatsinni peqateqarata iliuseqassannginnata, tassami nunarsuarmi angisuumi annikittuinnannguugatta. Taamaattumik suleqatigiinnissaq pingaartuuvoq. Annermilli maannakkut suleqatigiinnerit iluarisimaarpagut, isumaqarnatali, imartatsinnut iluaqutaassasooq suleqatigiinnik pilersitsigaluarutta nunat avannarliit killiit kisiisa peqatigalugit.



Tamanna tunngavigalugu siunnersuutip itigartinneqarnissaa innersuussutigaarput.